

**Gipuzkoako
Aldizkari
Ofiziala**



**Boletín
Oficial de
Gipuzkoa**

85

2022ko maiatzaren 6a, ostirala

1

GIPUZKOAKO LURRALDE HISTORIKOKO XEDAPEN OROKORRAK

GIPUZKOAKO FORU ALDUNDIA

OGASUN ETA FINANTZA DEPARTAMENTUA

242/2022 Foru Agindua, apirilaren 29koa, Gipuzkoako Foru Aldundiko Ogasun eta Finantza Departamentuak jaulkitako efektu tinbratuak trukatzeko baldintzak eta prozedura arautzen dituena.

Euskal Autonomia Erkidegoarekin hitzartutako Ekonomia Itunak, maiatzaren 23ko 12/2002 Legearen bidez onetsiak, 30. artikuluan ezartzen duenez, ondare eskualdaketen eta egintza juridiko dokumentatuen gaineko zerga tributu itundu bat da, araudi autonomokoa, sozietate eragiketetan, kanbio letretan eta ordezko balioa edo igorpen zeregina duten agirietan izan ezik; halakoetan arau erkideak aplikatuko dira, eta lurralde historikoetako erakunde eskudunek, halaber, aitorpena aurkeztu eta ordaintzeko ereduak onetsi ahal izango dituzte, baita likidazio aldi bakoitzari dagokion diru sarrerara egiteko epeak zehaztu ere, baina eredu horietako datuak, gutxienez, lurralde erkidean erabiltzen diren berberak izan behar dira; eta epe horiek, berriz, ez dira Estatuko Administrazioak ezarritakoez oso bestelakoak izango.

Ondare Eskualdaketen eta Egintza Juridiko Dokumentatuen gaineko Zergari buruzko abenduaren 30eko 18/1987 Foru Arauak 35. artikulua xedatzen duenez, Ogasun eta Finantza Departamentuko foru diputatuak ezarriko dituen efektu tinbratuen forma, estanzazioa, espeziea, ezaugarriak eta numerazioa, tinbratzea zuzenean lortzeko kasuak eta prozedura, efektu horiek trukatzeko baldintzak, eta haiek baliogabetzeko modua.

Ekonomia Itunean jasotako edukari jarraituz, efektu tinbratuak trukatzeko baldintzak araudi erkidean ezarritakora egokitu behar dira. Ondorio horietarako, Ondare Eskualdaketen eta Egintza Juridiko Dokumentatuen gaineko Zergaren

Erregelamenduak, maiatzaren 29ko 828/1995 Errege Dekretuaren bidez onetsiak, 117. artikuluan ezartzen du zer kasutan onartuko den efektuen zaintzaz arduratzen diren entitateek eta saltzaileek efektu batzuk beste batzuekin trukatzea.

Aurrekoaren indarrez, 2011ko apirilaren 6ko 339/2011 Foru Aginduaren bidez, Gipuzkoako Foru Aldundiko Ogasun eta Finantza Departamentuak jaulkitzen dituen efektu tinbratuen trukearen erregulazioa onartu zen. Foru agindu horretan ezarri zen zein kasutan onartuko zen efektu tinbratuak trukatzea, eta zein entitatearen bitartez egin ahal izango zen trukea, baina ez zen zehaztu jarraitu beharreko prozedura. Horregatik, komenigarritzat jotzen da efektu horien trukearen erregulazioa osatzea, eta, horretarako, xedapen berri bat ematea.

Horrenbestez, hau

XEDATZEN DUT

1. artikulua. Xedea.

Gipuzkoako Foru Aldundiko Ogasun eta Finantza Departamentuak jaulkitzen dituen efektu tinbratuak trukatzeko baldintzak eta prozedura arautzea da foru agindu honen xedea.

2. artikulua. *Efektu tinbratuak trukatzeko baldintzak.*

1. Martxoaren 22ko 9/2011 Foru Dekretuaren bidez onetsitako Gipuzkoako Lurralde Historikoko Ondare Eskualdaketan eta Egintza Juridiko Dokumentatuen gaineko Zergaren Erregelamenduak 30. artikuluan xedatutakoarekin bat etorritz, efektu tinbratuak eskuratzen dituztenek ez dute eskubiderik izango zenbatekoa haien itzultzeko, itzulketa eskatzeko arrazoia edozein dela ere.

2. Efektu batzuk beste batzuekin trukatzea kasu hauetan onartuko da:

- a) Mota guztietako efektu tinbratuei dagokienez, zerbitzuko behar edo komenientziengatik zirkulaziotik kentzen direnean, betiere baldin eta osorik eta erabili izanaren seinalerik gabe ageri badira, kasuan kasu emandako xedapenean gaiari buruz jasotzen diren arauekin bat.
- b) Notaritzako dokumentuetarako ez beste ezertarako paper tinbratuari dagokionez, trukea onartuko da baldin eta ekartzen den paper zatian Gipuzkoako Foru Aldundiaren folio zenbakia eta tinbrea ageri badira.
- c) Kanbio leiren kasuan, trukea onartuko da baldin eta idaztean balio gabetzen badira eta josi izanaren seinalerik ez badute, eta haietan inolako errubrikarik, izenperik, edo ondorioak sortu izanaren bestelako zantzurik ageri ez bada.

3. artikulua. *Efektu tinbratuak trukatzeko prozedura.*

1. Zalantzarik egonez gero, Ogasun eta Finantza Departamentuak izango du beti efektu edo dokumentu jakin bat trukatu daitekeen ala ez erabakitzeko eskumena.
2. Efektu tinbratuak Ogasun eta Finantza Departamentuan aurkeztuko dira, departamentu horrekin banaketa eta salmenta hitzartua edo kontratatua duten entitateek truka ditzaten, departamentu honek emandako jarraibideen arabera.
4. *artikulua. Prozedura arautuko duen instrukzio bat prestatzeko mandatua.*

Ogasun eta Finantza Departamentuko Idazkaritza Teknikoari agintzen zaio behar den instrukzioa prestatu dezala foru agindu honen xede diren efektu tinbratuen trukearen prozedura eta kontrola garatzeko.

Xedapen indargabetzaille bakarra.

Foru agindu hau indarrean jartzen denetik, indarrik gabe geratuko dira foru agindu honetan xedatutakoarekin bat ez datozen maila bereko edo beheragoko xedapen guztiak, eta, bereziki, apirilaren 6ko 339/2011 Foru Agindua, efektu tinbredunen trukea arautzen duena, Gipuzkoako Foru Aldundiko Ogasun eta Finantza Departamentuak emana.

Azken xedapen bakarra. Indarrean jartzea.

Foru agindu hau Gipuzkoako ALDIZKARI OFIZIALEAN argitaratzen den egunean jarriko da indarrean, eta data horretatik aurrera egiten diren trukeei aplikatuko zaie.

Donostia, 2022ko apirilaren 29a.—Jokin Perona Lerchundi, Ogasun eta Finantza Departamentuko foru diputatua.
(2704)